

# Paul, Bulh Nanki 'Udustl'us Timothy Ts'ó K'e Yanguz-i

Paul, Timothy hadih yulhni

**1** <sup>1</sup> Si Paul, Sizi Gri ba whél'a'-un usdli. 'Ilhiz be ts'úkhuna-i, 'i Gri Sizi 'en yut'i 'ink'ez 'ilhiz wheni 'unt'oh. 'I gha Yak'usda ndet sts'u hukwa' ninzun 'et huwa whél'a'-un susdli'.

<sup>2</sup> Timothy sye' ook'esi'-un inli ndi 'udustl'us nts'o tl'a s'aih-i. Yak'usda neBá 'ink'ez Gri Sizi 'en neMoodihti, 'en gha ye unzoo-i cha, be úgha te' nudzun-i 'ink'ez be nedzi dizghel-i cha, 'i 'ont'e' hukwa' nuszun.

Paul, Timothy yuba whunalni Sizi Gri ts'u nalh'a-un

<sup>3</sup> 'Et Yak'usda ts'un musi dusni. Stsoda'ne k'un'a, syo ts'e sgha t'ets'oninzun-i, lubeshi ooghu hooloh whe Yak'usda ooba' ne'ust'en. Dzin 'ink'ez 'ulhdzis ibulh, tenadusdli totsuk nghu ni zástan.

<sup>4</sup> Nyunats'ultoo' nus'en 'et whunaznih 'ink'ez tube nyutiselh hukwa' nuszun, 'et la hóst'e'.

<sup>5</sup> Ndi soo be 'alha 'uhoont'oh-i, 'i nyulh 'unt'oh, 'i oonaznih. Ntsoo Lois, 'en 'udechoo be 'alha 'uhoont'oh-i yulh 'unt'oh inle', 'ink'ez nloo, Eunice 'en cha. 'Ink'ez nyun cha 'et whuz un'a za 'int'oh, 'et sba 'alha 'uhoont'oh.

<sup>6</sup> 'Et huwa mba whunazni ndet da' ntsi k'et duznih whe Yak'usda huwa ya'aih-i, 'i ntl'a ídan'ai. 'I 'ants'i bulh ne'hilhnahe le' 'ilh'en.

<sup>7</sup> Yak'usda Ndoni neyídan'ai whe 'aw lhts'uníljut. 'Et huwa be ts'íltus be lhk'e ts'utsi'-i, 'ink'ez ne-eni be whunih tsinli.

Khuni unzoo-i khun hukwaya 'onle' junih

<sup>8</sup> 'Et huwa 'uyoonne neMoodihti ghun bubulh yailhduk de, khun hukwaya 'onle' junih. 'Ink'ez si cha 'adus'ai-un, 'et cha khun hukwaya 'onle' junih. K'us 'uyoonne khuni unzoo-i be bubulh yailhduk whe dzoh ninzut de, 'et de Yak'usda ye ulhtus-i, 'i gha 'ínt'en.

<sup>9</sup> 'En 'uja neulhyih. Nedzi lubeshi ooghu hootáloh 'et whuz un'a neka' ninzun. 'Aw neye 'ut'en k'oh gha iloh neka' dani'. Dich'oh ye unzoo-i,

'i gha 'uzdutijih ha neka' dani', 'et whuz un'a hukwa' ninzun. 'Ink'ez ye unzoo-i, 'i Gri Sizi 'en oots'u ha yílts'ut whe neghalts'ut. 'Et 'udechoo whe' whudutát'elh, 'et whutsoda' 'uhoonla.

10 'Et 'awet Sizi Gri netaninya. 'Et Yak'usda dich'oh hukwa' ninzun-un 'ink'ez ye unzoo-i cha, 'i yunénilhtan. Wheni bé dázitsah-i, 'i Sizi Gri neba gak yulhtsi 'ink'ez khuni unzoo-i, 'i be 'ilhiz be ts'úkhuna-i negha ínin'ai. Ndi 'aw dálhts'utisa-un, 'et neba whusahón'ai, 'et whe whunénilhtan.

11 'Et wheni si 'udun yun k'ut whut'enne, 'enne buts'u tisyalh. 'Enne bubulh yásduk, 'ink'ez whubodus'eh, 'et whuba buts'u whel'a'-un susdli'.

12 'Et huwa si cha dzoh nuszut, 'et hoonts'i 'aw hukwaya lhusdloh. Mbe sba 'alha' 'unt'oh-un t'enuszun 'et huwa. 'Ink'ez ndet oot'l'a hoos'ai-un, 'udek'ez dzin whuts'un soo 'ultus whe sba hootatun, 'et sba 'alha 'uhoont'oh.

#### Ndi khuni unzoo-i soo cho oontun

13 Ndi khuni ulhtus-i oogha 'uts'ut'en-i, si sts'un dants'o, 'i duts'o cho oontun. Ndi be 'alha 'uhoont'oh-i 'ink'ez be lhk'e ts'utsi'-i, 'i Gri Sizi 'en yulh 'unt'oh.

14 Ndai unzoo-i ntl'álya-i, 'i ts'iyawh Ndoni be ulhtus-i, 'i be soo cho hoontun. 'En 'unt'oh neyudínda.

15 Njan t'ooninzun ts'iyanne Asia whut'enne sch'az nahulhya. Phygellus 'ink'ez Hermogenes cha.

16 Onesiphorus 'en lhat sdzi dona' yulh'ih. 'Ink'ez ndi lhuztih tl'ool be whe dust'i-i, 'aw yukaya lhiloh whe sunalh'en. 'Et huwa 'en ooyoh dilhts'ine neMoodihti bugha te'nozeh.

17 'Et keyoh Rome ninya whe soo cho skunúta whe nasilhti.

18 'Et dzin neMoodihti<sup>a</sup> yugha te'nozeh. 'Ink'ez keyoh Ephesus ts'e lhat whe sla 'uja ínle', 'et cha soo t'ooninzun.

#### Ndi Sizi Gri ye unzoo-i, 'i be soo ilhtus ónle'

2 <sup>1</sup> 'Et huwa sye' nyun Sizi Gri ye unzoo-i, 'i be soo ilhtus ónle'.  
<sup>2</sup> 'Ink'ez lhane nalh daja nyudásni'-un, ndi khuni Sizi Gri ts'u ditnine tl'a dínle, 'on 'un 'uyoonne huye hódoolh'eh ha.

<sup>3</sup> 'Et huwa Sizi Gri oosalda unzoo-un k'un'a, howu whúlna'-un hoonts'i whulh ónyin.

---

<sup>a</sup> 1:18 'Et ndi boozi' neMoodihti, 'i 'ilhoghun Yak'usda 'unt'oh 'ink'ez 'ilhoghun Sizi Gri 'unt'oh ni whe 'utni.

4 Dune salda unli-un, 'en dumoodih ba za 'ut'en. 'Aw 'udun 'ut'en-i gha lhasnoh.

5 'Ink'ez cha, mbe la noye toh whuch'a' 'ulhdeh-un, ts'ih'un un'a whuch'a' nilhde de, 'et de za hiba k'elha whulhstsih.

6 Mbe la tube 'ut'en-un ha' nulhyeh-un, 'en haínalhyai-i, 'en cho yoloh yolhchoot huba' hoont'oh.

7 Ndet la nyudásni-un howu nuní ninzut. 'Ink'ez neMoodihti, 'en nla 'ut'en whe ts'iyantsuk t'eeononzeh ngha ho'alh.

8 Whunailnih, Sizi Gri yaidlane butoh dunadija. David oots'u haínzut-un cha 'unt'oh. 'Et ndi sghuni unzoo-i 'unt'oh whe nyudásni'.

9 'Et huwa dune unsi'-un k'un'a 'adus'ai whe dzoh nuszut. 'Et hoonts'i Yak'usda ooghuni 'i 'aw lhilghel whe 'unt'oh.

10 'Et huwa 'utahalyane, 'enne buba whulh susyin. 'Et de la 'ut'ahályane, 'enne cha Gri Sizi 'en ye néulhyis-i, 'i huyólhchoot 'ink'ez 'ilhiz huhót'e'.

11 Ndi khuni 'i soo cho oot'a niuznootan 'et ndutni,  
 “'En bulh dats'uzsai de,  
 'et de 'ilhiz wheni bulh 'úztit'elh cha 'uztit'elh.

12 Nts'oh dawhut'en hoonts'i whulh ts'úzyin de,  
 'et de 'en bulh lerwe 'uztileh.

Ooch'az nats'ulh'a de,  
 didut cha nech'az nátil'a.

13 Oolazditni de,  
 'et hoonts'i 'aw didut nela dootnih ait'oh,  
 'ink'ez 'aw 'ats'un un'a na'ootneh ait'oh 'et huwa.”

**Sizi Gri ba ne'ut'enne,  
 'enne whulohne hinzoo 'ink'ez whulohne cha hintsi'**

14 'Et ndi khuni 'i buba oonailnih. NeMoodihti nalh budutánelh, 'et khun 'i khuni gha hukwa lhdulhyoh 'uhudootni' junih. Ts'iyawh buba lhe'yízoo'. Mbe yudánts'one ts'iyawh ninta' butálh'elh.

15 'Et Yak'usda ba dune unzoo-un 'onle', whuz un'a hukwa 'int'en. Nye 'ut'en 'aw la hukwa yálhuzonle'. Ndi khuni 'alha' 'unt'oh-i ts'ih'un un'a dune hubodilh'eh.

16 'Et hoonts'i 'ants'i 'oh nuyálhdukne 'ink'ez Yak'usda ghudlólhne, 'enne buzih nónya' junih. Ndunt'ohne, 'enne 'uyoonne 'on nus Yak'usda ch'az yalhdukne ubuhutilhtselh.

17 Bughuni, dada k'un'a la butaidózit. Nyoonne Hymenaeus 'ink'ez Philetus cha, ndunt'ohne hinli.

18 'Et ndunt'ohne dune ndi khuni 'alha' 'unt'oh-i tank'us 'uhint'oh huwa hich'a súdil. 'Enne 'uhutni, ndi dunahudutádulh-un, 'uda' 'uhooja

hutni. 'Et whula gha ts'e whulohne be 'alha 'uhoont'oh-i, ts'iyawh buba musai suli'.

19 'Et hoonts'i Yak'usda ooyoh ook'u whuz'ai-i whuduts'o. 'Aw gak hóle' ait'oh. 'I k'ut khuni 'uk'e yánguz-i ndutni, “Mbene la neMoodihti ooch'e' unline, 'enne ts'iyawh t'ebunínzun.” 'Ink'ez cha, “Mbene la 'uhutni, Gri oodune'ne tsinli de, 'enne 'ut'en 'utsi'-i ts'u nín'tine, 'et ndoohoont'oh-un, 'et ts'iyawh whuch'az náhooleyeh.”

20 Nts'e yoh whucho whambez ts'e ts'iyaitsuk 'et 'usdla. Be' ts'utnai-i 'ink'ez bé uzut'alh-i, whulohkhi gold, 'ink'ez silver cha, 'i be 'ulya. Whulohkhi duchun 'ink'ez whutl'us be 'ulya, 'i cha 'et 'usdla. Whulohkhi unzoo 'ink'ez whulohki 'aw lhízoo'.

21 'Et huwa mbe dich'oh lubeshi 'uch'az nálh'a de, 'et de duMoodihti ba 'udune'ududulti 'ink'ez ooMoodihti ye' tit'elh, 'ut'en unzoo-i ts'iyawh yeni lhadínt'oh whe 'unt'oh.

22 'Ink'ez nts'en'a chilke ntsi'-i buyust'e oots'i nint'i-i, 'i ooch'a tilgaih. K'us ts'ih'un 'uhoont'oh-un, be 'alha 'uhoont'oh-i, be lhk'e ts'utsi'-i be nedzi soo óot'e'-i cha, ts'iyawh bunanyalh. 'Ink'ez ndunne budzi yo lubeshi ooghu hooloh whe neMoodihti ts'u dedudline, 'enne bubulh ín'us.

23 'Et hoonts'i whusni ghuni 'ink'ez khuni t'enusdzun-i, 'i hoonts'i be yáhalhduk, 'i ts'iyawh ooch'oh 'onle'. T'eeonínzun ndi khuni ndunt'oh-i, 'i dune huyé lhdulhyoh 'utni-i, 'i 'unt'oh.

24 'Et neMoodihti be 'ulhna-un, 'en 'aw dune élhdoosyaih. K'us ts'iyanne dune dach'e núlhe'ust'en 'ink'ez soo dune hodulh'eh-un 'onleh. Ts'iyanne nanilhtsulyaz ne'boolh'en.

25 Yo 'údudildzun 'ink'ez buch'az ditnine ts'ih'un bubulh nenáhoho'alh. 'Et tilah Yak'usda dudení nahundunizdla uboolhtselh. 'Et de sih khuni 'alha' 'unt'oh-i t'ehinoozeh.

26 'Ink'ez 'et la bubení bugha nádolts'it, 'ink'ez netsudule hubilhchoot inle' hik'une' oot'en ha, 'et la nts'oh whe tank'us hunint'i-un whuch'a nahooja'. 'Et 'udek'ez dzin whenghoh de, tube howa whútilna'.

**3** <sup>1</sup> 'Et njan t'eeononzin, 'et 'udek'ez dzin whenghoh de, tube howa whútilna'.

<sup>2</sup> 'Et dune dich'oh k'e nahutitsi', sooneya ka dáhadatni, ts'iyantsuk whe hududílti', 'uhududílti', Yak'usda 'ink'ez oodune'ne, buch'az yahatilhduk, dudusneke cha k'únulhe'hutist'en, 'aw musi lhontiszin, 'ink'ez Yak'usda ghudlohne cha hutileh.

<sup>3</sup> Dudulh dune k'elhihítsi', 'aw hoonli lhba whunalhnohodulhnoh. Dudulh dune dzoh ne'huduni' hukwa' huninzun te za ne'hut'en. 'Ants'et 'uyoonne dzoh nuhulhdeh, 'ink'ez ndet hoonzoo-un hukwa lhe'huntiszil.

4 'Uyoonne k'e hintsi' nahoooolh'i 'ink'ez yoo yoh whe dune hundulhda, 'ink'ez butsi dunuts'un. Duba na'hutidzoo', Yak'usda k'elhuhi'tsi', 'ink'ez ndet la whuníni-un, 'et za hukwa' huntizilh.

5 'Et Yak'usda ba ndi yun k'ut hudilhts'i na'hududil'i 'et hoontsi' Yak'usda yé ulhtus-i hits'oodidlai. Timothy ndunt'ohne, 'enne buch'a nasindaih.

6 Ndunt'ohne 'uyoonne yoh ts'e dahánul'ih 'ink'ez ts'ekoo whusnine, lubeshi be dizbunne, 'enne 'ilhiz ubihilhchuk. Lelhdowh 'ut'en dutsun-i, 'ohwhi za hits'u nint'i.

7 'Ahoohlhyiz hohodul'eh 'et hoontsi' khuni 'alha' 'unt'oh-i daja ni 'aw t'ehonoozeh ait'oh.

8 'Et nyoonne Jannes 'ink'ez Jambres bulh Moses hich'az nín'ti inle'. 'Et whuz un'a ndunne khuni 'alha' 'unt'oh-i, hich'az nint'i. 'Enne bubeni soo 'uk'enus untsi' suli'. 'Ink'ez ndi be 'alha 'uhoot'oh-i ghun buba 'ants'i hoont'oh.

9 'Et hoontsi' 'aw 'on 'un hutooya' ait'oh. Whe ninta' hunt'en-un ts'iyanne t'ewhüntázin. Nts'en'a Jannes 'ink'ez Jambres bubulh dahooja la, 'enne buk'un'a hiye whusni-i, ts'iyanne bughun t'ewhüntizilh.

### **Yak'usda uniyalhne dune bube túzilalh**

10 'Et hoontsi' huwa 'óonli whe khuni bunyodis'e-i ook'un'a 'ant'en. Timothy nyunch'oh njan t'ewhunínzun. Nts'en'a dune usdli-un, nts'e hukwa' 'ust'en-un, 'ink'ez Yak'usda sba 'alha' 'unt'oh. Howa whúlna'-un whulh susyin, 'ink'ez ts'iyanne be k'ési' 'i cha, 'aw hoonli talhódusni.

11 Dune sezula inle', 'ink'ez dzoh nusuhulhdzut. 'Et whuz yun k'ut Antioch, Iconium, 'ink'ez Lystra, whuz sulh 'et 'úhooja inle', 'i ts'iyawh t'eeonanzin. Dune sezula whulh susyin, 'ink'ez neMoodihti ts'iyawh whuch'a sla 'uja.

12 'Alha' hoont'oh k'us mbe Gri Sizi 'en gha Yak'usda ba khutinalh hukwa 'ut'enne, 'enne dune bube hütuzilalh whe' hoont'oh.

13 'Et dune ntsi'ne, 'uyoon na'dudil'íne, 'enne 'on nus hintsi' tileh 'ink'ez 'on 'un cha hintsi' hutileh. 'Et 'uyoonne nahunti'ah 'ink'ez dich'oh cha na'hunduntit'ah.

14 'Et hoontsi' nyun ndet la hodal'e'-un whe 'i ts'iyawh 'alha' 'unt'oh t'enínzun whuz un'a za 'int'oh. 'Ink'ez mbene la oogha hodal'e'ne t'ebuninzun.

15 'Et nyun ts'oodun inli da' whuts'un ndi Yak'usda ooghuni lubeshi ooghu hooloh whe 'uk'éguz-i t'enananzin. 'I gha be whutnih-i 'int'i whe dinjih, Gri Sizi 'en mba 'alha' 'unt'oh 'et huwa.

16 Yak'usda ooghuni 'i ts'iyawh Yak'usda ye sjiz-i bulh 'únt'oh.

'Ink'ez oogha whúts'odul'eh huba unzoo, ninta' ts'ut'ih-un whunénulhtun, neba ts'ih'un newhu'aih cha, 'ink'ez 'et whuneodulh'eh ts'ih'un un'a yinka 'uzdólt'si ha.

17 'I be Yak'usda oodune lhadúlya-un tileh, 'ut'en unzoo-i ts'iyawh wheni lhadint'oh.

### Yak'usda ooghuni bé bubulh yaílhduk

**4** <sup>1</sup> 'Et huwa Yak'usda 'ink'ez neMoodihti Sizi Gri 'en oobut nyudusni, 'en 'utinelh ts'iyanne nalh be hóodutaltsilh, ndai k'úne' yul'en-i, 'i bulh. 'Oh de khunane 'ink'ez yaidlane cha, 'enne buba nahutiye'h.

<sup>2</sup> 'Ahoohyiz lhadínt'oh Yak'usda ooghuni bé bubulh yaílhduk. Whúbunilhtun ndet whe ninta' hut'ih-un, 'ink'ez tank'us 'uhut'en-un hukwa budíni, 'ink'ez budzi do ná'inleh. Howa whúlna'-un whulh sinyin, 'ink'ez dune hodilh'eh.

<sup>3</sup> Whuz de whúdizulh, ndi khuni ts'ih'un un'a 'unt'oh-i, 'i 'aw huyodool'eh hukwa lhe'huntiszin. K'us dich'oh hukwa' huninzun k'un'a, 'et za hodutats'o hukwa' huninzun. Mbene la didutch'oh hukwa' huninzun te za dune hodulh'ehne, 'enne za uboohootuzálhts'ilh hukwa' huntizilh.

<sup>4</sup> 'Ink'ez khuni 'alha' 'unt'oh-i, 'i 'aw hidóts'o hukwa lhe'huntiszil. 'Et k'us khuni 'ants'i unli-i, 'ohwhi za hika 'untizilh.

<sup>5</sup> 'Et hoonts'i nyun ts'iyantsuk whunih-i be whuch'a soo cho kindli. Yak'usda be 'ut'en k'oh whulukhun mba howa whulna' 'et hoonts'i nilht'i za 'ilhdzun. 'Ink'ez Yak'usda ooghuni be yailhduk whe dune ilhyís-un, 'et za ndónt'en. 'Ink'ez Yak'usda be ooba 'int'en-i, 'i ts'iyawh lhadónleh.

### Paul datítsah-un howu yalhduk

<sup>6</sup> Si 'awet be khusna-i Yak'usda ba huwa t'aih k'un'a nadiusjulh le' 'usneh.<sup>b</sup> 'Ink'ez ndo tisyalh-un 'awet nilhdukw sulí'.

<sup>7</sup> Hoonzoo whe ts'ih'un un'a lhisgan. 'Awet Yak'usda be 'ut'en k'oh 'uwhus'en-un ts'iyantsuk lhaoodusla. Ts'ih'un un'a be 'alha 'uhoont'oh-i hostun.

<sup>8</sup> 'Udek'ez khuni be' dusni, ndet ts'ih'un un'a hoont'oh whe whuch'a oonusde-un, 'et sba 'us'ai. NeMoodihti ts'ih'un nahiyilh-un, 'en

<sup>b</sup> 4:6 Ndai la ts'ekoo too' dizti'-i loodel oozih nahidiyulh-i inle', 'i Lizwifne bube 'ut'en 'unt'oh. 'Ink'ez ndi nahidiyulh-i, 'i Paul khuna le' 'unt'oh ni whe 'utni.

yutilhtselh-i, 'et dzin sgha íta'alh. 'Ink'ez 'aw si za iloh. Mbene la dudzi ndulcho-i be bunalh be hódutalhtsilh 'ink'ez yuti'elh hukwa' ninzunne, 'enne 'ilhoghun hinli whe ts'iyawh si sk'un'a za 'úbutilelh.

### Ts'iyanne sla ditni

<sup>9</sup>'A cho sts'u tónya'.

<sup>10</sup> Demas 'en sla ditni. Ndi yun k'ut núkat-i 'on nus yuka' ninzun. 'Et huwa keyoh Thessalonica whuz whinya. Crescens 'en Galatia ts'e whinya 'ink'ez Titus 'en cha yun k'ut Dalmatia ts'e whinya.

<sup>11</sup> Luke 'en za szih usda. Mark 'en ookunainda 'ink'ez ndiz nyulh tóo'as, 'en sba 'ut'en huba unzoo 'et huwa.

<sup>12</sup> 'Ink'ez Tychicus 'en keyoh Ephesus ts'e whes'a'.

<sup>13</sup> Ndiz tanyalh de, sdzoot sba tolhchoos. 'I Carpus keyoh Troas ts'e 'en da' oozih neínuschooz. Nyoo khuni úk'éguz-i, 'i cha ton'a', 'ink'ez khuna-i zuz ook'u ne'úsuguz-i, 'i oonaoodolnoh junih. 'I soo ooka' nuszun.<sup>c</sup>

<sup>14</sup> Nyoon lhuztih 'ult'l'uz 'ut'en-un, Alexander huyulhni, 'en tube lhat-un whe sundílhda'. Be 'ut'en k'oh huwa uncha neMoodihti yuba 'uk'elha whulhtsi.

<sup>15</sup> Nyun cha ookwa huwonle'. 'En dune ulhtus-i be neghuni dulhyoh 'it'elh-un 'unt'oh 'et huwa.

### NeMoodihti 'aw nela dootnih ait'oh

<sup>16</sup> 'Et 'udechoo ooduzkut da', 'aw 'ilhoghun hoonts'i st'a nélhiyal. K'us ts'iyanne sla huditni, 'et hoonts'i 'aw buk'e holts'it hukwa lhe'núszun.

<sup>17</sup> 'Et hoonts'i neMoodihti szih inyin 'ink'ez 'en ye ulhtus-i, 'i gha 'ustus inle'. 'Et ndi ulhtus-i, 'i be si sgha la ndi Yak'usda be ba yaduk-i, 'i ts'iyawh ts'ih'un un'a huyoozálhts'ai'. 'Et de la 'uyoonne 'udun yun k'ut whut'enne cha ts'iyawh huyoozólhts'ai'. 'Ink'ez cha neMoodihti 'en khuna-iti sutuzilhghelh-i yuch'á sulhyih.<sup>d</sup>

<sup>18</sup> 'Ink'ez yak'uz neMoodihti 'en lerwe unli, 'et wheni sghunli, 'ink'ez oozih tisdalh whuts'un, 'ut'en untsi-i ts'iyawh yuch'a sutálhtelh. 'Et huwa 'en 'ilhiz wheni 'ink'ez 'on 'un cha uzdólhti'. 'Et ndo honeh.

---

<sup>c</sup> 4:13 Paul khuna whe 'oh da' khuna-i zuz lhahidulh'ih-i, lhts'enuhuyut'az 'ink'ez 'i hik'u ne'uguz inle'. <sup>d</sup> 4:17 Ndi khuna-iti sutuzilhghelh-i 'et whuz un'a Lerwe Caesar lhane Sizi Gri yulh 'ut'enne, 'enne cha ubuhangan, ni whe 'utni.

**Khit whutso whusaóonya'**

19 Ndunne Prisca 'ink'ez Aquila, 'ink'ez cha Onesiphorus ooyoh dilhths'ine, ts'iyawh hadih sba budóni'.

20 Erastus 'en keyoh Corinth 'et usda. Trophimus 'en nduda 'inka keyoh Miletus ts'uwhútni, 'et nenústi.

21 'Et khit tileh whuts'o, 'et soo 'int'oh whe sts'un tonya'. Eubulus, 'en cha hadih nyulhni, 'ink'ez Pudens, Linus, Claudia, 'ink'ez ts'iyawh lhulhutsinke, 'enne cha hadih nyuhútni.

**Ye unzoo-i nyulh óot'e'**

22 NeMoodihti Sizi Gri 'en ndzi yo ooda' 'ink'ez ye unzoo-i, 'i nyulh óot'e'. 'Et ndo honeh.